



Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 7

Yangia anidakangma :



Tir Yimym



tir_yimym



tir yimym

TAPAK 8

Xi-i Trump dang Taiwan ken o kumdanga jembitsü ashi

Frederic national junior tebur hockey team coach kumogo



VOL. XXIII ISSUE NO. 211 (ADOK 211) DIMAPUR ROGONÜ (FRIDAY) MONUPII (MAY) 15, 2026

₹ 5.00

DMC floor test May 22 nü alitsü

Dimapur, Monupii/May 14 (TYO): Dimapur Municipal Council (DMC) telungzük nung yimten yimsüsürtem mangatettep tamajungba kuma Brehostibarnü Deputy Commissioner, Dimapur-i DMC Chairperson Hukheto Yepthomi anema no-confidence motion benoka lir ta ashi aser May 22 nü floor test atema senden ka jazükogo.

Deputy Commissioner, Dimapur, Dr. Tinojongshi Chang, NCS-i sangdong ka agütsüba nung, motion ya Nagaland Municipal Act, 2023 kübok shia aliba inyakyim ama lir ta ashi.

DMC nung elected members 23 aliba nungi züngsem 12-i meyongnem agüja aliba no-confidence motion ya DC indang office nem May 11 nü DMC elected members anati agütsü, ta ashi.

Iba motion ya inyakyim nung tejangja aser shidak lir aser motion indang jembitsü 'special meeting' jazüktsü melar, ta sangdong nung ashi.

DMC indang elected members tem iba senden ya May 22

anüngdang 11:00 ako nungi DMC office nung amentsü. Iba senden nung ex-officio aser nominated members tem madentsü, ta jangjatsüogo.

DMC nung ruling coalition telungzük nung telemsa tali adokba mapang iba ya ataloker.

DMC indang deputy chairperson Imlinaro Stephanie Ezung-i anir Bharatiya Janata Party (BJP) nungi councillors trok aser Naga People's Front (NPF) nungi züngsem trok ajanga no-confidence motion ya benok ta angazükter.

DMC inyaksangshi nung BJP councillors tem senzüka yutsür aser coalition partners süka mapa menungloksür ta aitsüba osang temai adoka liasü.

Nagaland Municipal Act, 2023 kübok chairperson anema no-confidence motion ya nüngdaka aliba elected members temi bhukumra benoktsü melar, aser iba sülen DC ajanga mapang tatakzük nung iba motion nung vote agiteptsü atema senden jazüktsü shia lir.

Ozüng dang temaba lokti mali: DNSU-i dokan shibangtsüba aitsür

Dimapur, Monupii/May 14 (TYO): Tawa Dimapur Naga Students' Union (DNSU) ajanga JDS Interior Shop shibangtsüba mechi Brehostibarnü Dimapur Urban Council Chairmen Federation (DUCCF), GB Union Sadar, Dimapur Chamber of Commerce and Industry (DCCI), aser Churches Colony Council ajanga pangzüng trok renema kecha lokti-ia pei sasa özüng mamshitsüla ta ashi.

Iba telungjem senden ya Hotel Saramati, Dimapur nung mena dokan shibangtsüba ya tai aser özüng alema lir ta jembia liasü.

Iba senden temer osangbener den jembidang, onoki DNSU nükjidong anemer masü saka parnoki mera agiba nung tai apur, ta DUCCF tir Zasiwikho Zakiesato-i jangjatsü.

"Onok DNSU den lir, saka tazüokba ka lir. DUCCF aser GB unions tema özüng kübok aser district administration den teka amteper mangatettep benteter," ta pai ashi.

DNSU ya kaketshir telok ka asünung, kaketshir dak sendakba

mapa kisüng inyaksüla, ta pangzüng nung ashi. DCCI-i memeteti DNSU-i business dak sendakba inyakyim nung teka mesangshitsüla aser indigenous certificates dak sendakba ken o ya bushisüngdanga özüng nung aliba ama mera agitsü atema district administration dangi abentsüla, ta ashi.

Parnoki district administration dang ashikülak mapa inyaka Non-Naga Indigenous Certificate meshi ta tai tongokja alisang Girdhari Lal Sharma ya DUCCF, GB Union Sadar, DCCI aser DNSU lia jaoka asüngdangyatsüla ta ashi.

Parnoki iba senden nung lemteba nung manidakra, tarutsü nung DUCCF, DCCI aser GB Union Sadar ajanga DNSU den amalitep malitsü ta takumdangtsü ashi.

Özüng agi memelai indigenous certificate anguba anema nokdakba aser DNSU-i iba ama tebilemstü anema nokdakba asoshi pelar, saka dokan meshibang dang kechiba colony council nem osang magütsü, ta Churches Colony Council chairperson Kuholi Chishi-i ashi.

GB Union (Sadar) tir W Kholie

Kapfo-i ashiba agi, mangatettep tila-teri adokba nung jembishinüa angatettepba mapang colony councils aser GBs temi administration den yaritepa arur, aser parnoki makoktsüsa ken o tem tapet ketdangtsür nem agütsür.

"Lokti tentet temi administration aser özüng amshiba agencies mapa amshi tenzükra, ibaji tim masü. Dokan shibangtsüba ya özüng agi memelar," ta pai ashi.

Media osang ajanga dokan shibangtsüba indang angazükba sülen onoki mezüngbo FIR benoktsü bilem, ajisüaka lenirtem tetsüngtai aitba aser Naga Council Dimapur den sensaksema sülen iba telemteba ya soit, ta DCCI tir Akashe Zhimomi-i ashi.

Indigenous aser ILP dak sendakba tebilemstü ken o nung DCCI nokdaka lir, aser kaketshir tentet tem tim yimya nung inyaksangshitsüla, ta pai ashi.

Özüng alema inyaksangshiba anema nokdakba nung onok dena lir, aser metokmeperi aser tim masüba mapa inyaka ta tai tonglokja aliba tem özüng agi mela aliba ama bentettsüla, ta parnokisa ashi.

Kohima Police-i temesepba mozü aika apu



Dimapur, Monupii/May 14 (TYO): Özüng alema temesepba mozü shibelenba anema maneni nokdakba nung Kohima Police-i takok tulu nguteta heroin, opium aika den nisung ana May 5 & 12, 2026 anogotem operations balala nung puogo, ta Kohima Police sangdong ka ajanga ashi.

Kohima Police nungi mobile unit ka Khuzama Police Station kübok May 5, 2026 nikongdang 4:20 ako meta patrolling senzüba mapang temulung melemteti Maruti Alto (registration number NL07CD 5992) ka Kidima nungi Viswema tsütsüi aoba mapang soita liasü.

Iba sülen parnoki gari ya tema telung kaka bushiba mapang heroin (Shan Flower) südi ta temulung melemteti aliba sapon cases 25 nung sepa aliba ngutet. Iba temesepba ya grams 302 shi liasü.

Iba dak sendakba nung parnoki gari nung mena alir nisung ana apu. Tena ya arishi küm 28 tain Kharamo Aziah aser arishi küm 39 tain A.L. Keystone ta jangjaogo.

Ano May 12, 2026 nü Kohima Police indang mobile unit team ka Kezocha PS kübok patrolling sebzüba mapang Kidima nung Mahindra Bolero (registration number AS03X 1718) ka soit, koba Mao nungi Kohima leni oyaa liasü.

Parnoki iba gari meita bushiba mapang Opium tuozük seret trok shi aliba talep trok (talep ka nung seret ka) iba gari indang abelen speaker compartment nungi ngutet, ta Kohima Police sangdong ajanga ashi.

Iba dak sendakba nung gari nung mena alir Mohan Chhetry (tebur) aser R. Chaonai (tetsür) apu.

Iba sülen parnoki Khuzama PS aser Kezocha PS nung ken o benoka item shibelenba tesendaktep kaktettsü asoshi bushisüngdangba mapang lir, ta metetdaksü.

Kohima Police-isa nüburtem dang temesepba ozü ayokba mesüra shibelenba osang lemsateptsü ayongzük aser osang agütsür tenüng temai madoktsütsü ta ashi.

Nagaland nung horticulture terenlok asoshi MoU zülutep

Dimapur, Monupii/May 14 (TYO): State nung public-private partnership model ka ajanga horticulture renlok daksütsü atema Department of Horticulture-i Natural Fuel India, Chümoukedima aser Sathwaro Farming Group, Gujarat den tripartite memorandum of understanding (MoU) ka zülutepogo.

Iba tezüngzüktep ya Brehostibarnü Kohima nung Commissioner and Secretary, Horticulture department indang office chamber nung zülutepa liasü.

Nagaland nung contract farming, cluster-based cultivation, post-harvest management, processing aser

horticultural produce nung jenjang tali ketdaksütsü asoshi sorkar aser private sector stakeholders amalitep akatsü nükjidong nung iba mera ya agi.

Iba tezüngzüktep kübok partners temi jero lu ayimba renloksü aser kiwi, litchi, rambutan aser spices ama jenjang aketba horticulture crops tem tashi itshitsü atema külemi inyaksü.

Iba project nungya solar dehydration units, cold chain facilities amenoktsü aser domestic aser export markets atema market linkages tajung amenoktsü shia lir.

Iba public-private partnership model ya ajanga production, processing,

logistics, aser marketing sendaktepba horticulture ecosystem yanglutsü aser state tesem ajungalen aluyimer rongsenketzüng jenjang tajungba kumdaksütsü teimla lir.

Sathwaro Farming Group, Gujarat ya 2008 nung tenzükba sülen alima nung Indian agriculture tejakleni odaktsüba mapa inyaker aser süngjang-lijang tabu 80 dak tema tsünüa amshia arur.

Natural Fuel India ya Pristine Foods indang shilem ka lir, koba 2015 küm tenzük aser Nagaland nungi agro-produce tem temaba jenjangi ajungketa aluyimer tem yariba mapa inyaka arur.

Department-i Income Tax Act tasenba indang osang prokshir

Dimapur, Monupii/May 14 (TYO): Linük tesem ajungalen Prarambh 2026 (Policy Reform and Responsible Action for Mission Viksit Bharat) nung shilem ka ama tasenba Income Tax Act 2025 indang awareness sentong ka Brehostibarnü Hotel Grand Maspel nung agia liasü.

Iba sentong ya office of the Principal Chief Commissioner of Income Tax, North Eastern region, Guwahati kübok Income Tax Department, Dimapur ajanga ayongzüka liasü.

April 1, 2026 nungi amshiba Income Tax Act, 2025 tasenba

indang taxoyers, stakeholders aser nüburtem nem angatetdaksütsü nükjidong nung iba sentong ya ayongzük.

Tax system tajungba, tongmelangba aser teyakyakba kumdaksütsü asoshi Department-i stakeholders ajanga den lungiemer inyaksü tebilemba lir. Iba den iba osang ya yim dak yimsüngtem nunga prokshitsü sentong lir.

Department ajanga Income Tax Act tasenba osang ya social media, print media aser electronic media densema sapang balala nungi nüburtem den lemsatepa arur.

Iba sentong nung Commissioner of Income Tax (Appeals), Imlimeren Jamir-i Income Tax Act, 2025 tasenba aser Income Tax Rules, 2026 indang tongmelang agi lemsatepa liasü aser Commissioner of Income Tax (TDS) T James Singson ajanga Income Tax Act, 2025 nung TDS overview & provisions indang jembia.

Maneni Income Tax (I&CI) Deputy Director Upendro Nahakpam-i Income Tax Act, 2025 nung Statement of Financial Transactions (SFTs) indang lemsatepa liasü.

Mkg nung Ayushman Student Coverage Mission senden menogo



Dimapur, Monupii/May 14 (TYO): "100 Days Ayushman Student Coverage Mission: Registration & Card Generation Camp" dak sendakba nung senden ka May 14 nü DC Conference Hall, Mokokchung nung Deputy Commissioner & Chairman, District Implementation Unit (DIU), PM-JAY/CMHIS, Mokokchung Ajit Kumar Verma, IAS lenisüba nung menogo.

Iba senden ya LDA/CA cum BIS NHPS Takotemjen Longkumer lenisüba nung agia liasü.

Senden nung Chief Medical Officer, Deputy Chief Medical

Officer/Nodal Officer PM-JAY/CMHIS, District Education Officer (DEO), schools 31 aser college 5 nungi ketdangsürtem, ANPSA Mokokchung Unit representatives, District Administration nungi ketdangsürtem aser ken o dak sendaka aliba officer aser staff temi shilem agia liasü.

Senden nung DPC NHPS Tekamongla Walling-i, iba mission benoka inyakba idang metetdaksü. Sensaksem ya school aser college tem nung kaketshirtem kwi ali, mayimjemi aliba kaketshirtem jangjatsüba aser Ayushman card generation

atema school aser college tem semdangtsüba dak rangloker agia liasü.

Deputy Commissioner-i, atakzükja aliba mapang tsüngda iba mission takok ngua inyaksü atema department tem aser kaket rijutem tsüngda kanga junga angatetepa inyaksü koda tongtibang iba indang lemsatep.

Paisa, stakeholder ajak dang district nung PM-JAY/CMHIS kübok takok tashi kaketshirtem ayimjema inyaksü asoshi teka amteper inyaksü ajungshia liasü.

Senden ya shilem agirtemi pei tebilembatem lemsatepba sensaksemba sülen tembanga liasü.

Nagaland BJP-i Delhi nung NE nungi tetsür ana dak teka sangshiba aitsü

Dimapur, Monupii/May 14 (TYO): Bharatiya Janata Party Nagaland unit-i, Delhi nung Northeast nungi tetsür ana dak mekongshitsü yimya agi kongshiba aser teka sangshiba aitsüogo.

Assam aser Nagaland nungi tetsür ana dak iba yimya benshiba ya minprongtsüka aser agizüksü makok aser tetsürtem meraket aser tekümzükba dak sendakba ken o süoki ia bilemstüka keta lir. Iba ajanga India kübok tesem balala nung Northeast nungi nüburtem

mebendangi amshitsü aser kümzüka toktsütsü nungdakba tali tejangjaba kümdaktsür.

Tetsür ana dak teka sangshiba aser mekongshitsü yimya agi kongshiba aser aiben mepeshiaka telangzüba mapang shitak nung magütsüba ya tebilemstüka lir. Iba amala inyakyim ya humanity anema aser civilized society ka nung iba amala yimyakoya khenyongi mebenshitsu, Media cell-i ashi.

BJP Nagaland-i ken o dak sendaka aliba ketdangsürtem dang kecha tebandang makai

ken o bushisüngdangtsü aser aibelena alirtem nem tapet temerenshi agütsütsü akhanger. Party-isa, tetsürtem tekümzükba kübok toktsütsü aser linük kübok tesem balala nung Northeast nungi nüburtem mezüngmeshia amshiba nokdangtsü atema jenjang tapet agitsü ayongzükogo.

Ken o nung akoksa alirtem den party nokdaka lir aser ochi obendang takaratiba nung agütsütsü imla atar, ta BJP Nagaland Media Cell-i metetdaksü.

Central Farmers Wing Appreciative Enquiry Tour ka agiogo



Dimapur, Monupii/May 14 (TYO): Central Farmers Wing indang Appreciative Enquiry Tour ka May 14 nü NPF Mokokchung Division Conference Hall nung agiogo. Central team yagi NPF Mokokchung division aser talisa division indang Farmers wing den sensaksemstü atema Mokokchung semdanga liasü.

Sentong ya Farmers Wing, Mokokchung Division tir Repamangyang-i lokti pela agizükba o jembir tenzük. Pai telungjem aser teka amteper inyaksü aser lokti nung

aluyimertemi tongtibang shilem agiba indang lemsatep.

Senden nung Central Farmers Wing tatong tir aser Mokokchung Division Farmers Wing In-charge Dr. Mangyangpula-i, aluyimba lokti terenlok aser tejakleni anir aotsü atema onük balala benoka jembia liasü.

Senden nungsa Dr. Mangyangpula aser la den külemi aruba ketdangsürtemi o jembia aser parnoki aluyimba sector akangshitsü koda tongtibang iba indang lemsatepba den grassroots nung

nisung timba nem shilem agidaktsütsü ajungshia liasü.

Kasa mapang nung NPF Mokokchung Division tir Repameren Yaden-i, aluyimertem terenlok asoshi maneni bendanga agüja inyaksü aser party principle tem nungi masetshitsü ajungshia liasü.

Sentong ya Working President, Farmers Wing, Mokokchung Division Bendangtoshi-i tepela o jembir tembanga aser iba sülen metsüjangnatsü aser süngtong lemja liasü.

Naga nunger lokti tentet balalai TBCA lenirtem tepsetba aitsü

Dimapur, Monupii/May 14 (TYO): May 13 nü Manipur kübok Kangpokpi District nung telungpurtemi Thadou Baptist Association Church lenir asem tepsetba den aika yirutsüba Naga Mothers' Association (NMA)-i aitsüogo.

"Onoki asür lenirtem den asükhu lemsateper aser yirur alirtem yakta taneptsü angutsü sarasademja atar. Tsüngremi parnok nem tesunep agüjang," ta NMA-i ashi.

Parnokisa Manipur nung mepetmesü adoker aliba mapang pua alirtem ajak kecha timtem makai chiochtsü ayongzükogor. "Asenok ya alima matsüngdang Khrista dak amangertem lir. Asenok joko ojang dang azütokshiti aser yimjung nung külemi ledi," ta kasa sangdong ajanga metetdaksü.

sangdong ajanga metetdaksü.

Tai maketba Arogo nung tenzükertem tepsetba ya tasümaiter inyakyim ka aser Islamic radical tem dang nungi tamajungba, shirnoki amokmerena, tepseta nüburtem apudakdaksütsü meranger.

Aibelena alirtemi parnok inyakyim ya meyipa parnok dangi arutsü ta angatetsüla, tai maketba Tsüngrem tenzükertem tepsetba ya Tsüngremi memerenshibo metoktsütsü.

Maneni onoki Manipur sorkar dang ken o takaratiba nung bushia aibelena alirtem obendangtsü ayongzükogor, ta NMA-isa shisem.

Kasa mapang nung NSCN/GPRN - Reformation-ia, telungpurtemi taochi makai Arogo nung tenzükogor asem tepsetba aser pezü kanga mejungi yirutsüba aitsüogo.

NSCN/GPRN-i, asür kinungertem den asükhu lemsatepba den tasü ita alitsü ajungshio, kechiyong "mangyangbaji Tsüngremi meyerenshi yoktsü, ta ashi.

Maneni N. Kitovi Zhimomi lenisüba nung Working Committee (WC) Naga National Political Group's (NPPGs)-ia May 13 nü Rev. V. Sithou aser Thadou Baptist Association (TBA) team tepsetba osang angazüka kanga aoksaba lemsatepogo.

Rara nung aliba linüktem nunga sepaitemi civilian tem tepsetba mesüra lisopurtem nem takoksa bener arutsüba ya magzükogor, saka prangbong hadir teperi bener Arogo nung tenzükertem tepsetba ya bilemdangtsü makoker aser ajaki aitsütsü nungdaker, ta kasa

Arogo nung lenirtem tepsetba ya telok kati danga nangzüka mali, saka shir telok südir süaka iba amala temenen mapa ya bilemdangtsü makoker aser iba inyakyim ya tesunep aser yimjung nung alitsü asoshi merangtepba anema lir.

WC, NPPGs-i asür kinungertem aser TBA kibong den asükhu lemsateper aser yirur alirtem takaratiba nung taneptsü angutsü imlaja atar ta ashi.

DDMA Chumoukedima-i ayongzükogor senden menogo



Dimapur, Monupii/May 14 (TYO): Tzünglurowa atema renemshia atatsü asoshi District Disaster Management Authority (DDMA), Chumoukedima mezüngbuba Quarterly senden May 14 nü Deputy Commissioner Office Conference Hall nung menogo.

Senden ya Deputy Commissioner, Polan John, NCS lenisüba nung agi, kong department balala tekolaktem aser department balala nungi lenirtemi shilem agia liasü.

indang metetdaksü. Sensaksem ya disaster response mechanisms, tzümetsüng nokdangtsü atema jenjang agitsüba, lenmang ajanga tesendaktep, power supply management, healthcare atema renemshiba, tzü supply, chiyongtsü aser tenüngdakba osettem renema atatsü aser tanga jongdak mapang tenüngdakbatem dak rangloker agia liasü.

Senden nung Chief Medical Officer, Dimapur; Executive Engineer (Power); Executive Engineer PHED; DCSO Food & Civil Supplies; Chief Veterinary Officer, Veterinary & Animal Husbandry; Executive Engineer PWD (R&B) / PWD (NH); General Manager NHIDCL; and the Superintending Engineer Investigation Cell, Water Resources Department, Chumoukedima amala department temi shilem agia liasü.

Senden nung tzünglurowa maru tsüngda renema atatsü asoshi onük balala benoka sensaksemogo aser talisa nüburtem kümzüka toktsütsü aser lendong ataloktsü aliba tajemba kümdaktsütsü asoshi department tem tsüngda sendaktepa inyaka mapang shitak nung jenjang agitsü atema sensaksema liasü.

Senden nungsa department temi tzülurowa atema parnoki renema aliba sentong balala

Senden nung tzünglurowa maru tsüngda renema atatsü asoshi onük balala benoka sensaksemogo aser talisa nüburtem kümzüka toktsütsü aser lendong ataloktsü aliba tajemba kümdaktsütsü asoshi department tem tsüngda sendaktepa inyaka mapang shitak nung jenjang agitsü atema sensaksema liasü.

Senden nungsa department temi tzülurowa atema parnoki renema aliba sentong balala

BRICS FOREIGN MINISTERS' MEETING
14 - 15 May 2026 | New Delhi, India



May 14, 2026 nü New Delhi nung BRICS Foreign Minister tem senden nung tangokba noksa nung angur. (Ajichilen nungi) UAE Ministry of Foreign Affairs MoS Khalifa Shaheen Al Marar, Ethiopia Minister of Foreign Affairs Gedion Timothewos Hessebon, Egypt Minister of Foreign Affairs Badr Abdelatty, Brazil Foreign Minister Mauro Vieira, India External Affairs Minister S Jaishankar, Russia Foreign Minister Sergey Lavrov, South Africa Minister of International Relations & Cooperation Ronald Lamola, Iran Foreign Minister Abbas Araghchi, Indonesia Foreign Minister Sugiono aser Chinese Ambassador to India, Xu Feihong nunger angur.

Uttar Pradesh nung ajungben yipru lendong nung nisung 89 asü

Lucknow, May 14 asü.
(Agencies): Bodhbarnü Unnao, Badaun, Bareilly aonung Uttar Pradesh kübok aser Pratapgarh district tem district aika nung ajungben yipru nunga nisung asüba osang lir. mopung tesashi aitba den külemi Tesem aika nung süngdong lao tzünglu aser tsüngi lendong aser ki aika chirepa liasü. nung nisung 89 süogo; jara Yipru dak sendakba lendong chirepba, ki chirepba, süngdong balala nung nisung 53 yiru aser laoba aser tsüngi yaloktsüba kiset shirurua 114 asü, ta state lendong balala nung parnok 89 sorkar ketdangsertemi asü. metetdaksü.
Prayagraj district nung India Meteorological nisung 21 asü, Sant Ravidas Department-i taruba anogotem Nagar nung nisung 14 asü, nung north India tesem aika Fatehpur nung nisung 11 asü nung tzünglu sashia arutsü, ta aser Mirzapur nung nisung 10 tekümdangtsü metetdaksüogo.

NEET paper leak asübaji coaching centres nung prokshi: CBI

New Delhi, May 14 bushitetogo.
(Agencies): NEET UG 2026 Iba sülen 'scan' asüba paper question paper ji teka agi ji Rajasthan kübok Sikar nung züluba liasü, aser ibaji 'scan' aliba coaching centres nung asüba sülen Rajasthan nung kaketshirtem tsüngda prokshia candidate ka tebuti PDF files liasü. küma yanglu, ta CBI-i bushisüngdangba ajanga mapang nung coaching institute bushitetogo. nung inyaker staff tem aser kiburtem danga asüngdangyaa liasü.
May 3, 2026 nü NEET exam agia liasü, ajüsüaka iba tatidang question paper leak asü, ta osang prokba sülen National Testing Agency (NTA)-i NEET exam agibaji tamagila kümstü.
Question paper ji mezüng anguba sülen Yash Yadav alir ka, Shubham Khairnar-i, ajanga prokshia liasü. paper leak asüba nung tongti Yash-i Vikas Biwal meteta asalentong yanglurji pa masü, liasü aser Biwal tebu, Dinesh ta shiogo.
Biwal-i teka agi züluba paper Paper leak asübaji kong ji scan asüba sülen PDF file nungi tenzükar jangjatsü atema yanglua liasü, ta CBI-i maneni bushisüngdangdar.

EC-i state 16 aser UT 3 nung SIR shilem tasembuba tenzüksü

New Delhi, Monupii/May 14 (Agencies): Brihostibarnü Election Commission (EC)-i state 16 aser Union Territory asem nung Special Intensive Revision (SIR) shilem tasembuba tenzüksü, ta sangdongogo.
Election Commission-i ashiba agi, SIR shilem tasembuba kübok Booth Level Officers (BLOs) lakh 3.94-i kibok shia dangi atutsü aser voters crore 36.73 ayimjemtsü.
BLOs denji Booth Level Agents (BLAs) lakh 3.42-i yariteptsü. BLAs ji yimtenren party balalai shimtsü, ta kasa osang ajanga metetdaksü.
Himachal Pradesh, Jammu & Kashmir aser Ladakh nung SIR exercise agitsü atema sangdongtsü.
Election Commission-i ashiba agi, SIR shilem tasembuba kübok Booth Level Officers (BLOs) lakh 3.94-i kibok shia dangi atutsü aser voters crore 36.73 ayimjemtsü.
BLOs denji Booth Level Agents (BLAs) lakh 3.42-i yariteptsü. BLAs ji yimtenren party balalai shimtsü, ta kasa osang ajanga metetdaksü.
Election Commission-i, SIR exercise nungji voters, yimtenren party tem aser election ketdangsertemi shilem agitsü, ta metetdaksü.
EC-isa yimtenren party tem dang iba maparen teladak asütsü atema polling booth shia nung BLAs shimang, ta mepishia metetdaksüogo.
SIR exercise mezüngbuba shilem aser tanabuba shilem kübok states aser Union Territories 13 ayimjema liasü. Shilem ana nungji voters crore 59 ayimjema liasü.

Congress Party-i Kerala CM menden atema VD Satheesan shimogo



New Delhi, May 14 (Agencies): Tawa Kerala assembly election nung Congress-i takok anguba sülen tesüiba anogo aika Chief Minister menden atema telemtetba magiteti aruba sülen tesüsa Brihostibarnü CM menden atema V D Satheesan tenüng sangdongogo.
Brihostibarnü pa Congress Legislature Party (CLP) shim aser May 18 nü pai Chief Minister tenangzükba agitsü, ta Congress-i metetdaksü.
May 4 nü election osang sangdongba sülen anogo 10 nü tashi Congress-i CM menden atema kanga ratamata-a aruogo.
Brihostibarnü osangbenertem senden ka nung Ajay Maken, Mukul Wasnik aser Deepa Dasmunshi nungeri Satheesan tenüng sangdong.
CM menden ya KC Venugopal aser Ramesh Chennithala natia aginüa liasü.
Kerala assembly election nung Congress-i aniba UDF teloktepi menden 102 nung takok ngua liasü aser LDF-ibo menden 35 dang nguteta liasü.
V D Satheesan ya taoba Kerala Legislative Assembly nung Opposition lenir liasü.
Satheesan-i tawa election nung Paravur constituency nungi takok angu aser tang agi kümzük trokbenbuba MLA inyaktsü.
Pai vote 78,658 ngua CPI candidate E T Taison Master madak takok angu.
Satheesan ya Kerala Pradesh Congress Committee nung tatong Tir-a inyakogo aser 2021 küm election sülen nungi Opposition lenir inyaka aru.

Pa 1964 küm Kochi anasa Nettoor nung aso aser pa ya lawyer ka lir. Pa mezüng Kerala Students Union (KSU) nung lenir inyak aser Youth Congress nung dena yimtenren nung ajemoka liasü.
Pa Kerala Pradesh Congress Committee (KPCC) nunga executive züngsem aser All India Congress Committee (AICC) nunga züngsem lir.
Pa Kerala High Court nung lawyer teinyakdak mapang 2001 küm pai North Paravur assembly menden nungi toktepa liasü.
Pa Nettur aser Panangad na nung azüng aser Sacred Heart College, Thevara nung degree ngua liasü, iba sülen Rajagiri College of Social Sciences nungi Post Graduate Diploma in Social Service renem.
Pa Law Academy, Thiruvananthapuram nungi LLB renem aser Government Law College, Thiruvananthapuram nung LLM renema liasü.

DIRECTORATE GENERAL OF EMPLOYMENT
MINISTRY OF LABOUR AND EMPLOYMENT, GOVERNMENT OF INDIA,
SHARAM SHAKTI BHAWAN
RAFI MARG, NEW DELHI-110 001
Central Employment Exchange
Advt. no-02/2026

Mapa bushir aser temsüa alir SC/ST nisungtem dang nungi item atema application meshir (1) Special Coaching (2) 'O' level One year IT training (3) 'O' Level Computer Hardware maintenance training (4) Office Automation, Accounting and Publishing Assistant (5) Computer Application and Business Accounting Associate (6) Cyber Secured Web Development Associate Programme (7) Course on Computer Concepts (8) Foundation of Artificial Intelligence Technology, (9) 3D Printing: Design and Development Fundamentals, aser iba ya 01.07.2026 anogo nungi tenzüksüa akok
Mapa bushir SC/ST nisungtemi www.ncs.gov.in mesüra www.dge.gov.in nung 'What's New' tab nung reprangba sülen application ji National Career Service Centre nung agütsüsüla, SC/STs atema (list ji DGE website mesüra NCS portal nung angutsü), tekalen shia aliba program nung candidate temi jangraba agitsü akok. NCSC nem application agütsüsü atema SC/ST asoshi tatembangbuba anogoji 31.05.2026 asütsü. Candidate temi course ka dang agitetsü akok. Candidate temi parnoki jangraba sasep nung courses shima agütsüsüla. CBC : 23105/11/0002/2627

केनरा बैंक Canara Bank **KIOJEN AYOKTSÜ SANGDONG** **SPECIALIZED ASSET RECOVERY MANAGEMENT BRANCH**
2nd Floor, Dee Bee Grande, 6 Mile, Panjabari Road, Guwahati-781022, E-mail- cb7259@canarabank.com

Securitisation and Reconstruction of Financial Assets and Enforcement of Security Interest Act, 2002 aser Rules 8(6) of the Security Interest (Enforcement) Rules, 2002 kübok kiojen E-auction asütsü sangdong.
Public dang, talisa tsünglanglen shia aliba sen apur (tem) aser Guarantor (tem) dang ya sangdonger, Secured Creditor dang mortgaged süa aliba tsünglanglen shia aliba kiojen ya Canara Bank nung Authorised Officer-i agiadokogo aser ibaji Canara Bank Branch-i sen apur & Guarantor dang nungi sentsüh alangzüksü atema 30.05.2026 anogo nung kiojenji "Kong aliar yamaji" aser "Yangji aliba ajak" basis nung ayoktsü.
Earnest Money Deposit (EMD) ji 30.05.2026 anogo nikongdang 11:00 ako tashi nung mesüra iba anogo matongdang asütsü.
Auction ji website: <https://banknet.com/> ajanga "Online E-auctioning" asütsü.
Auction anogo aser mapang: 30.05.2026 anogo nung anüngdang 11:00 ako nungi nikongdang 12:00 ako tashi (Ayokba maparen metembang tashi minuite pongungu (5) atsülangtsü).
Branch, sen apur/guarantor, liability, kiojen osang aser EMD, reserve price osang tejangja:

(A) Secured Creditor/Branch Tening aser Address	Brief Description of Immovable Property	(A) Total Liabilities (Rs.): (B) Reserve Price (Rs.): (C) EMD (Rs.): (D) Increment Amount (Rs.):
(A) Canara Bank, Specialised ARM Branch, Guwahati 2nd Floor, Dee Bee Grande, Panjabari Road, Six Mile, Guwahati- 781022 (B) Borrower / Partner / Guarantor: Shiniho Kakheto Jakhalu S/o Shiniho, Marble and Granite House, Purana Bazaar, Kohima Road, Dimapur, Nagaland, PIN- 797112	Revenue Circle- Dimapur, Dist.- Dimapur, Nagaland kübok Thilxü, 3rd Mile, Block- IV, Bye Lane 5 nung Mr. Shiniho Kakheto Jakhalu tenüng nung aliba ali tasazük 1 Bigha 02 Katha 10 Lechas (200ft * 180ft = 36000.00 Sqft) As per land allotment order Sl. No. 90 dated 25.05.2012 Bounded as under:- North: Approach Road, South: Fishery, East: Paddy Field, West: Holiheh.	(A) 89.01 Lakh (B) 92.96 Lakh (C) 9.30 Lakh (D) 0.50 Lakh

Iba safe telatetbatem aser osang tejangjaji Canara Bank indang website (www.canarabank.com) nung link "E-Auction" nung angutsü mesüra mapa inyakba anogotem nung office mapang yangi tongtepratepang- Branch Head of Specialized ARM Branch, Guwahati, 2nd Floor, Dee Bee Grande, Panjabari Road, Six Mile, Guwahati, PIN- 781022, Contact No. +91-7411004517.
Date: 13.05.2026, Place: Guwahati **Authorised Officer, CANARA BANK**



TIR YIMYIM YIMOBILEM (EDITRIAL)

DIMAPUR FRIDAY, MAY (MONUPII) 15, 2026

Khristan Kibong

Iba hapta ya Ao Baptist Arogo Mungdang kübok aliba Ao Baptist Arogotem ajak nung Khristan hapta amunger. Atangji, Khristan purtem kibong asoshibo anogo shia ya Khristan anogo aser hapta shia ya Khristan hapta lir. Ajisüaka, küm nung hapta ka mejeteta Khristan hapta amungba ya asenok taküm aser kibong nung teinyaktsü ka amadoker alinunga ta ser nenshiba amato, asenok lia aodang asen kibong agi Khristan kibong memesüki kuma oa lira, khen anener asen taküm aser kibong jenjang meyipa reprangshitsü asoshi agütsüba mapang tajungtibaji tang ama Khristan hapta amungba anogo aser mapangba ya asütsü. Ashiko, asenoki Khristan kibong ta asüdang ya, jet ta iba kibong nungjibo kodanga merarateper aser tasatepa masateper, teti tesünep aser tepela nung dang alir ta bilema alitsüa akok. Ajisüaka, Khristan kibongji kotak masü aser molumia masü, anungji Khristan kibong asüyonga teti tepela nung dangbo malir aser teti jashia danga malir, saka tepela o tejashi na prongla den takoker kuma litetbaji Khristan kibong lir. Aji oda, Billy Graham kinungtsü Ruth-i ashi ama, Khristan kibong ya taitoktetba mulungjang ana longjemer aliba telungjem lir, kechiyong alima nung tangar kibong amato Khristan kibongtem nunga aiben tejashitep adoker. Ajisüaka, Khristan kibong merakasai otetba tashiji kati ka den tai toktetba nungi angur. Ruth Billy Graham-isa ashiba agi, Khristan kibong nung kodanga mepelatep madokra, aji aibelen masüba agi masü aser aremzükbä kisung agia masü saka kinungtsü o kinungbo na rongnung ka tagidak makaba nisung asütsü. Atangji, Khristan kibong tatem tashi Khristan den otetsüba tashiji temeim, taremsük aser taitoktetba nungi angur. Ajisüaka, aiben asenok Khristan kibongtem nung mangateti benshibaji, tatishitsü agi kinungboji Tsüngrem tenzükbä mapa nung lira, kinungtsü pa denji mashimashi jembir, kechiyong pabo Tsüngrem tenzükerji aremzüksü ta bilemer. Kasaji, kinungtsüji Tsüngrem metetba tetsür ka süra, kinungboi la mezügmeshia amshir, kechiyong laibo aremzüksü ta bilemer. Aji oda, Khristan kibong nung Tsüngrem metetba kinungtsü mesüra kinungboji akümtsüba amshitsü melen mezügmeshia amshiba agi Khristan kibong agi Khristan kibong memesüki kümdaktsüba kibongtem aika lir. Ajisüaka, Khristan kibong topur jungdaktsüsbaji apuani tsüngda kati ka meimba dang masü saka tenung sangtepa aser khen khen aibenlendang tatok nangzüksü mulungtetba aser angatetba ajanga Khristan kibong nung teronem mesamar. Atangji, apuani rongnung katibo tatok agütsütsü bilema alitsüa akok saka aibeleneri tatok memeshira tatok agütsüsbaji jenjang maka kümadoker. Khristan kibong aika iba ama tatok menangzüktetba timtem agi kangshiba angur. Aji oda, Apijemtsü shin 28:13 nung, "shibai ozüng raksaba temenen mimbanga yudir, paji azükaru masütsü, saka shibai pei temenen nangzükdir, pabo taochi angutsü," ta shia aliba ama, asenok alima nung alir asünungji, Khristan kibong nungi asüyonga Tsüngrem anema aibelentsü, aji Tsüngremia meteta lir, ajisüaka Tsüngremi aginübaji asenoki Pa anema tai menar külen, aji mimbanga meyui tatok nangzükdaktsüner, süra pai asen dang taochi sayutsü renema dang lir. Asenok Khristan kibong nung iba Laishiba tapu aser tekong nung shia alibaji, talisa, tang ama Khristan hapta amungdang taroki ia angatetsü merangtsüla. Atangji, aseni Tsüngrem aser nisung anema tai menaba nangzüksü melen mimbanga yura, kodaser asen kibong azükarutsü ? Iba ama mimbanga aliba temenen agi, asen mapang nung dang masü saka asen kibong nung sotetba chirnur aser semchirsepnurtem tashi azükaru masütsü. Azükaru maliba timtem aser takoksa ya kanga tulu lir, kechiyong asenoki meranga inyakaka tebok masungtsü aser asenoki kongshiba nung temotsü malitsü. Aji oda, tang ama Khristan hapta amungba mapang ya kibong nung apuani aser tanurtemi pei pei tai bushia Tsüngrem dang nangzükbä aser kibong nung temoatsü züngdanga tenüngsang agütsüba mapang tajung ka asütsüla. Atangji, Khristan kibong ya tai nangzüktetba aser taitoktetba nisungtemi akümba telungjem ka lir ta angateta, kati ka tenung sangtepa iba telungjem nung züngsem tajung ka kuma alitsü merangtsüla.

OLEMSABANG

SHILUNOKTAK - TAOCHI AENLENMANG

~ O. Tongpang Jamir

(Iba Yimdangjem otsü ya Tir Yimyim aser Bookipedia nati ayongba toktep nung shilem agirtem rongnung ka liasü)

(Yashi adok nungi...)

- 1872 nung Rev. Dr. E. W. Clark-i arua Osangtajung sangokja asenok tenük lapoktsü. Shisaliok sayu, ibaji agi asenok nüchi aküm. Akhidangbo class kwi azüng ta masü saka tazüngtsü kaketji Tasen Lai asüba agi Mathi, Mark, Luk tashi züngogo ta sa jembia aru. Ao oshi azüngzülu tenzüker küm 10/15 shi lirang tangar tenzükbä joko talisa Tenyidie-bo talangka oadokogo.
- ABAM o AKKOR na küm 25 dak tali raratepa amungdang, asenok Ao oshi talangka langtsüngleni alu. Aji oda menur asüyonga tanü ABAM aser Ao Senden lungjemshir asen Ao oshi kanga renloka odar, asenok ajaki yangji temulung agütsüshidi.
- Language vs. Dialect ya bendangteta ayutsü tim. Ao language kübok Jungli, Mongsen aser Changki asemji dialect lir. Tatishitsü agi English kübok American English aser British English ta asübaji dialect lir.
- Ao oshiji aikati sensaker ta jembir saka aji tai. Ao oshi ya kanga takar lir. Tatishitsü agi English agibo item ojang ajak dang ya wash ta dang ajar saka Ao nungbo tokolak alok, tejak mei, teka metsük, tetsüng mit...a.a.
- Oshi yayim nung ajak dang nungi tongtibangtibaji ano zülumen (spelling) ya lir. Asenoki English nungbo ojang ka/ana tai zulu nung maaksü ama bilemer saka asen Ao oshi nungbo mashimashi züluyonga kecha hauta mali odang yutsür. Tatishitsü agi praise and worship alidang ken ojang nung zülumen tai zülur aiben atenba angur.
- Asen tetsü oshi renloka aser wazüka ayutsü asoshi tang jembia aluba tajento ajakji pei mulungzüng nung ayuba den maneni lanurtemi, asen oshi nung adokba osangkakettem tatishitsü agi Tir Yimyim, Ao Milen aser ocetsep Lenjeter amala teti azüngtsü ni ajungshir.

Tapu tenet

Mapa, taküm tembar aser tetushi

Dr. Taochibenla aenlenmangji mezüngbuba mapa anguba nung metembang. Shisaliok lu nung tsükdangradang jenti koktetba, ochi nung mainshi-i noktakba aser masetshiba tamang ajanga, lai jenjang ka nungi kati atu.

La Associate Professor jenjangi ajungket, aser iba kümjisa taküm nung mamatoktettsüsa mapa ka tenji. Lai Tsüngrem akhümtsübuba ajanga Khrista jakla tangloka aliba den la tsüngdenkuden nung apetasong kecha maket ajaki nükshitsüsa liasü. Anungji lanuwa nungi la asüngdang jenti liasü, saka lai shinga dena haihaura mekatepi lia aru, kechiyong la nükjidong ka sarasadema yua liasü aser aji pei tatongtsü ka matong tashibo tetongteji khenyongi mayutsü.

Aji oda, mapang agi nongjunga arudang joko tsüraburia kibong akümtsülaja ta aiben nongshi. Saka lai Tsüngrem dang masüngdangi kecha mapa nunga sotaka meinyak. Lai ajak ayimjema metetba den sobaliba nunga kanga takang, anungji Tsüngremi mapang tatong nung itemji ataloktsütsü lai sarasadema ata.

Külem College nung tenzüker Geology nung Assistant Professor ka tenung agi Dr. Maongyanger ta sür tatoktajang (handsome) asangur ka liasü. Pa ya-a pei mapa nung kanga dang bendanga agüja inyaka Tsüngrem metetba nisung ka. Mapang shia Dr. Abenla tena peipei lu indang bushia aodang külemi senzütsüsa aiben ajurushia ata. Shisaluyimertem mulungjang ateta atsüngtsüsa tenaprongi shisaliok nungji züp ta bener arua sayuteta liasü.

Tena kati ka metetper joko küm ana/asem renteta aodang puinren nung otsü longteper, tamang indang jembir, aser taküm nükjidong saoktepa atongtep. Katia ka mulungjang ngutepa asalentong ajak shitepa ao. Künü tesüngjem nikongdang ka Dr. Maongyangeri Dr. Taochibenla dang ashi, "Abenla, anaprongi taküm nung yipru tesashi aika ajangshia aruogo. Tsüngremer anogodong tashi aotsü ano taküm lenmang anendaka lir, anungji ibaji ana külemi lungjemer jajatsü nai mulunger asü?"

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazüngeru angateta agitsü mepishir

Manipur nung Arogo lenirtem tepsetba aitsür: Catholic putirtem



May 14, 2026: India nung Catholic putirtemia Manipur nung Baptist Khristan lenir asem tepsetba sashia aitsüogo.

Catholic putirtemi sangdong ka ajanga, "Loktiliba nung tensa mesüngjemteti aliba mapang ka nung teimla aser tashi agütsür yimsü lenirtem tepsetbaji onoki sashia aitsür," ta metetdaksü.

Parnokisa, May 13 anogo nung Thadou Baptist Association nung Tir aser Kuki nungertem rongnung lenir, Vumthang Sithou den külemi pastor ka densema Kuki Arogo nung lenirtem tepsetbaji onoki sashia aitsür, ta metetdaksü.

Arogo nung lenirtemji Churachandpur district nung yimsü dak sendakba senden ka nung adenba sülen Kangpokpi jilai meyipa aoba mapang nung

len tom nung mejangjaba nisungtemi mendanger amak.

Iba tatalokba nung nisung pongu-a yirua liasü.

Catholic putirtemi, "Rara ajanga zübo tuluba dang kümdaktsür aser mapang talangba timtemdaktsür, iba denji külemi tamangertem tesendaktep tashi meiti kümdaktsür," ta metetdaksü.

2023 küm May ita nung Manipur nung Khristan Kuki-Zo tribal nisungtem aser Hindu Meitei nungertem tsünga rara tulu adoka liasü, aser tang tashi nung iba rara nung nisung 260 dak tali süogo, noklang aika yiruogo aser nisung 60,000 dak tali jenshiogo.

United Baptist Churches Council aser Fellowship of Naga Baptist Associations densema Khristan organization

aikati iba tatalokba aitsüogo.

Manipur nung Arogo lenirtem jagi lisopur Khristantem tsünga yimjung atema kanga meranga inyakogo, ta parnoki metetdaksü.

Talisa taküm April 18 nü Ukhul district nung Naga nung ana tepsetba sülen Kuki aser Naga nung na tsünga tesendaktep ano tamajungba aküm.

Kuki-Zo aser Meitei tsünga tensa kanga süngjemadokogo, ajisüaka lisopur Khristan telok balala tsünga tensa kanga mejungi akümer.

Nütsüng million 3.2 aliba Manipur state nung nütsüng shilem 41 shi Khristantem lir aser nütsüng shilem 53 Hindu Meitei nungertem lir.

Tamil Nadu nung yi tenokdangba Arogo lenirtemi pelaa agizüker

May 14, 2026: Tamil Nadu nung Chief Minister tasenba, C Joseph Vijay-i Tenla kitem, tekülem kitem, schools aser bus stations anasa aliba yi ayokba dokantem ajak shibangtsü atema tetuyuba agütsüba atema Arogo nung lenirtemi pelaa lemsatsep.

Iba telemtetba ya ajanga yi dak sendakba tebilemtsü kanga ajema akümtsü, ta parnoki metetdaksü.

Tamil Nadu nung Khristantem rongnungi mezüngbuba Chief Minister ji Joseph Vijay lir.

May 10 nü pai Chief Minister tenangzükba agiba sülen anogo ka dang lirbo pai Tenla ki aser tekülem kitem, shisaliok rejutem aser bus stations telongtet metre 500 nung aliba yi dokantem ajak hopta ana tsünga shibangtsü tetuyuba agütsü.

May 13 nü osangbener den jembidang Jesuit putir aser lawyer, A. Santhanam-i,

"Atangji shisaliok rejutem aser tekülem kitem anasa aliba yi dokantem ajak shibangtsü atema iba telemtetba ya shidak agiogo," ta metetdaksü.

Paisa, "Tang chief minister tasenbai talisa tanurtem atema tebilemtsü kaja iba telemtetba ya agiogo, kechiyong school anasa yi dokantem alibaji ajanga tanurtem nem osang tai ka sangoktsür," ta metetdaksü.

Santhanam-isa, Vijay indang election manifesto nung temesepba mozütem nokdangtsü aser yi dak sendakba tebilemtsü balala ajema akümtsü atema inyaktsü nangzuka lir, ta ashi.

Paisa, "State nung tetsürtemibo yi ya khenyongi nokdangdaksüner, kechiyong yi ajanga takoksa tuluba angurtemji tetsürtem lir," ta ashi.

Franciscan Missionaries of Mary congregation nungi sister Elizabeth Rani-ia, sorkari telemtetba tajung agiogo,

ajisüaka yi meshimeshia nokdangtsü atema inyaktsüla, ta ashi.

Osangbener den jembidang lai, "Tila tanurtem-a yi nem puadaktsür, kechiyong school tem anasa yi ayokba dokantem lir aser taintemi yimjak nung yi ajemer," ta ashi.

Laisa, state nung yi ya meshimeshia nokdangtsüla, kechiyong yi ajanga kibongtem raksatsür, tanurtem sendoker aser ozüng alema inyakba mapatem kanga bulua akümer, ta ashi.

Tang Tamil Nadu nung yi ayokba outlets 4,765 lir aser item retail outlets ajakji Tamil Nadu State Marketing Corporation kübok lir.

Tang Chief Minister tasenbai tuyuba kübok tekülem kitem aser school anasa aliba yi dokan 700 dak tali shibangtsüsa akümtsü.

Nütsüng million 72 aliba Tamil Nadu state nung nütsüng shilem 6 bo Khristantem lir.

ANOGO ABEN TSÜNGREM DEN

Tejen makümba tajung

"Tamang, teimla aser temeim teti alir"

1 Korinth 13: 13.

Tamang, Teimla aser Temeim. Item o asem yagi Khristan tetezü jenjang temabaji tongdaktsür. Itemji arogo, lokti mesüra kin taküm nunga tenüngdaktsü lir.

Tamang - Mezüng putu nung America nungerji alima ajak nung tenzükba mapa inyaktsü shimtet ta jembia aru. Yamaji Naga kintem rongnung Tsüngremi Ao kinji balaka meima osangtajung asoshi shimtet ta jembir. Paji asenok asoshi tatembangba tekümzükdak aser yimsüsür ta angateta iba tenangzükba Pa nem bendanga agüja khrista nung tanaben sodi.

Teimla - Asenoki tarutsü nung rangloker koba nung mapa tuluba inyaktsü mapang tajung tenangzükba dena lir. Tarutsü nung temeket meta ajak nung yimjung alitsü asen ajaki sarasademer.

Temeim - Iba sempet yagi tamang aser teimla ochi shia alenteptsür. Asenoki Tsüngrem tematiba jenjang nung meimba agi dang aser asen kiyonger chichilaba nung meim nung dang Tsüngremi asenok nem nüchi agütsüba angatetsü.

Saka tang tamang, teimla, aser temeim, item asem teti alir, aser item rongnung temeim tulutiba. Junger, item ajakji sempet tajung, aser teti alir. Asenok ajaki asüngdangtsübaji item tajungtem ya, asenok den teti alir asü masü? Chichiba khristan ka dakji anogoshia item sempettemji alitsüla, aji asünung dang tebu Tsüngremi agizüktsü aser tangaria iba jagi dang asen dakji Khrista angutsü.

Brandon Lake aser Nick Jonas nati atenba ken 'The Author' sayaogo



Brandon Lake & Nick Jonas

May 14, 2026: Khrista shia kentener balala den osangtajung kentener, Brandon Lake aser Nick Jonas nati külemi atenba tekülem ken 'The Author' sayaogo.

Iba ken sayaba sülen mapang tatsüka tsünga iTunes charts top 10 nung lir.

'The Author' kenjang kar yamai lir, "Küm aika lir tang mezüng iba Kaket bena arur. Kaket tapak nung auyi keta lir saka ni merüktettsüogo. Kü taküm ya otsü ka lir saka zülutsü tasak. Ajisüaka iba otsü ashitsü langa lir asü? Anungji ni shiba? Ni shiba? Ni ya sensaker sayutsünger ka tamadokba jabaso asü? Timtem agütsüba tanur, nemzua senzür ka. Kaket zülusang teka nung aliba kolek ashishitsüsa ni shiba?"

Brandon Lake-i mapang

shia kentener balala den longjemer ken atener. Taküm küm tetenzüklen-a pai country kentener Jelly Roll den külemi atenba ken "Hard Fought Hallelujah" sayaa liasü. Iba kenji ajanga tenati Best contemporary Christian music performance Grammy Award nguogo. Iba ken ajangasa K-LOVE Fan Awards aser Dove Awards nung Song of the Year awards angu.

Taoba ita (April) nunga Brandon Lake-i Lainey Wilson den külemi atenba "The Jesus I Know Now" ken sayaa liasü.

Nick Jonas ya pastor kibong nung intet. The Jonas Brothers-i 2005 küm Columbia Records den contract sign asüba sülen tebu pastoral ministry tokja liasü.

AO OSHI ANGAZÜKDAK:

TANÜ ANGAZÜKTSÜBA OJANG



Yasatzüra

(adj) ayatzüraba timtem mapang (thirsty and hungry,drought)

* Yasatzüra mapang arem shirurutem aika asür.

Yaset

(v) chi mechiyongba agi lumi, kanga aya (extremely hungry)

* Covid mapang nisung aika chiyongtsü mangu yaset.

OLONG PAITEP # 7504

Grid for crossword puzzle #7504 with numbers 1-16 indicating starting positions.

TIPLÉN

- 1. Ojembitsü tashi - 8
5. Süngjang tapu ka - 5
7. Tekanük nung enokba - 5
8. Teka amtep - 5
12. Tzüik asendak - 5
14. Tsüngpang tema aliba - 5
15. Ken atenba yimya - 5
16. Asangur - 8

LANGTSÜNGLEN

- 1. Tepok telung nung shilem ka - 7
2. Tamajung aküm - 5
3. Chi den külemi achiba - 3
4. Meimchir alimai aruba - 3
6. Laishiba nung ayong ka - 4
9. Tarutsü nükla - 7
10. Tamendakdak/Nükjidong - 4
11. Tenük-telen mejungi aküm - 5
13. Terok nungi adokba - 3
14. Meimchir telemsa - 3

OLONG PAITEP # 7503 TELANGZÜBA

TIPLÉN:

- 1. Taa, 3. Teküm, 6. Aibelen, 7. Aut, 9. Ajizük, 10. Ojala, 11. Semer, 13. Sen, 15. Kioktsü, 17. Itsük, 18. Kar.

LANGTSÜNGLEN:

- 1. Tai, 2. Asensor, 3. Tanü, 4. Kua, 5. Mitsüktsü, 6. Azübenshi, 8. Lah, 9. Jangkok, 12. Akok, 14. Nashi, 16. Sür.

NAI-A YA METETTER



July 19 nü New Jersey kübok MetLife Stadium nung 2026 World Cup final asayaba mapang Super Bowl ama half-time nung Madonna, Shakira aser K-pop kentenba telok BTS nungeri shilem agitsü ta FIFA-i metetdaksüogo.

Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimiyim@gmail.com nung yokang mesüra Tir Yimiyim bureau tem nung agüjang.

Manipur nung KCP-PWG züngsem pongu puogo



Imphal, Monupii/May 14 (Agencies): Manipur nung security force temi meita aoba mapang Kangleipak Communist Party (People's War Group) (KCP-PWG) ngutetsang Laishram Ranjit Singh densema züngsem pongu puogo. Telungpurtem ya Bodhbarnü Imphal West kübok Langol nung parnok jenoka aliba tesem nungi pua liasü.

Ketdangsurtemi ashiba agi, KCP-PWG ya Manipur nung tenokdangba agütsür aliba telungpur telok ka lir, aser parnok ya talisa valley district tem nung rakzükradem maparen balala nung sendaka lir. Kangleipak Communist Party ya 1980 küm tenzüik aser PWG faction ya küm tem tsüngda maneni inyaksangshia arudar.

Pua alirtem rongnung self-styled founder chairman Laishram Ranjit Singh (52),

shiba dang Tamnganba, Apik, aser Loya ta-a ajar pa densema lir. Pa ya Imphal West nung Yurembam Awang Leikai nungi apu.

Pa den Bishnupur district kübok Thanga Karang Mamang Leikai nungi Oinam Somenchandra Singh-a puogo, shiba Langol, Imphal West nung alir

Sepaitemi apuba tanga züngsemtem rongnung Sekmai Kanglatombi Mantriband nungi Arambam Birkumar, Thoubal district kübok Tentha Khunjao nungi Maibam Tomba Singh (39) aser Heibongpokpi Maning Leikai nungi Chabungbam Lamnganba Meitei (38) nungera densema lir.

Security force temi parnok ket nungi mobile phone pongu aser Aadhaar card asem puogo.

Tanga meita aoba sentong ka benoka inyakba mapang

security force temi Bishnupur district nung Moirang Police Station kübok Keipha lenmang anasa Loktak Mapal nung prangbong injang aika ngutetogo.

Sepaitemi ngutetba prangbong injangtem rongnung Loktak Mapal ka, 9 mm pistol ka den magazine, 2-inch mortar shell ka, HE-36 hand grenade pezü, smoke grenade ana, improvised rocket morta ka, gelatin sticks asem, anti-aircraft ammunition, assorted ammunition rounds 28, ballistic cartridge pongu, stun grenade ana, 2-inch Para ILL bomb ka, shotgun injang ana, Baofeng radio set ka aser bulletproof plates ana densema lir.

Sepaitemi apuba telungpurtem aser oset balala ya pei tata police station tem nem bendanga agütsüogo aser ken o maneni bushisüngdangtsü.

Assam: Anghi-i minister tem nem portfolio lemezüksüba agizükogo

Guwahati, Monupii/May 14 (Agencies): Assam Angh Lakshman Prasad Acharya-i, Council of Ministers atema Chief Minister Himanta Biswa Sarma-i portfolio balala lemezüksüba agizükogo. Iba ajanga state cabinet nung minister mapa balala lemshiba tembangogo.

BJP lenir tejen Rameswar Teli nem Transformation &

Development, Labour Welfare aser Tea Tribes & Adivasi Welfare mapa lemezüksüogo.

AGP tir Atul Bora nem Panchayat 7 Rural Development, Implementation of Assam Accord, Border Protection & Development aser Excise mapa agütsüogo.

Kasa mapang nung Charan Boro-i, Transport and Welfare of

Bodoland departments achaayangtsü.

Minister Ajanta Neog nem Women and Child Development aser Tourism departments mapa nongloktsüogo.

Anghi-iba ya agizükba sülen Chief Minister Himanta Biswa Sarma lenisüba nung Assam Council of Ministers tem mapa lemshiba inyakyim tembangogo.

Tripura: Totzü kümzüksü atema CM-i convoy size ajemshitsüogo



Dr. Manik Saha

agia liasü.

Convoy nung tang gari pezü dang kümogo, kong Chief Minister indang gari ka densema lir.

Maharaja Bir Bikram Airport nung osangbenertem den sensaksemba mapang Shah-i, convoy size ajemtsü atema pai-a mulunga lir ta shiogo.

Ato Kilonser-i lisopurtem dang nisung shia gari ata-a bener mesenzütsü, public transport, electric vehicles amshia totzü kümzükba ayutsü atema jenjang agia totzü tajemba amshitsü ayongzükba sülen tang iba jenjang agiogo.

Ajisüaka state nung VIP tem senzüsenpong nung iba amala inyakyim ya benoka inyaksü minyaksü, iba indangbo Chief Minister indang Office ajanga kecha osang magütsü.

Agartala, Monupii/May 14 (Agencies): Asia anüolen mepetmesü adoker aliba ajanga Ato Kilonser Narendra Modi-i totzü kümzükba ayutsü atema ayongzükba sülen Tripura Chief Minister Dr. Manik Saha-i pa indang official convoy ya gari tenet aliba nungi

pezü dang küm daksüogo, ta ketdangsurtemi Brehostibarnü metetdaksü.

Ketdangsurtemi ashiba agi, Saha Bodhbarnü Guwahati nungi meyipa aruba sülen Chief Minister aser Director General of Police Anurag na sensaksemer iba telemtetba ya

Iran rara mapang Netanyahu-i miimshia onok mesemdang: UAE

Abu Dhabi, Monupii/May 14 (Agencies): US-Israel nati Iran den raraba mapang Israel Ato Kilonser Benjamin Netanyahu-i 'miimshia' United Arab Emirates semdang ta pa indang office-i ashiba iba Gulf linüki magizüker.

Bodhbar aonung state news agency WAM nung sangdong ka prokshiba nung, "Israel den tesendaktep ya ajaki meteta lir aser ajaki meteta aliba aser yimjak nung sangdongba Abraham Accords indang framework telungzük nung amendaka lir. Item tesendaktep ya miimshiba nung amendakba masü," ta UAE-i ashi.

"Anungji yimjak nung memetetdaksüi semdangba indang jembiba ya UAE nung tapet ketdangsüri mesangdong tashi tamendak dak maka," ta ashi.

Netanyahu indang office ajanga Bodhbarnü social media sangdong ka nung, Iran dak bomb pokloktsüba tialong nung Netanyahu-i 'miimshia semdangba' mapang UAE Tir

Sheikh Mohamed bin Zayed Al Nahyan den senden ka amen, ta ashi saka anogo tejangja mesangdong.

Office-i iba ya linük ana tsüngta tesendaktep nung otsüsüsü mapang ka liasü ta ashi.

Israel aser Gulf linük tsüngta, talisa Iran dak sendakba security ken o nung tesendaktep ulushir ama ajitetba mapang ka nung iba osang ya temai adoker.

United States Ambassador to Israel Mike Huckabee-i tan hopta ang, Iran-i amaknungbo ta tebilemba nung Israel-i UAE nung Iron Dome air defence batteries aser sepaitem yoka lir, ta shia liasü.

Mongulbarnü Tel Aviv nung sentong ka nung jembidang Huckabee-i UAE tushia Israel aser Gulf Arab linüktem tsüngta tesendaktep tajungba akumba tatishitsü ama amshia liasü.

May 5 nü Iran nungeri par linük amakba sülen Netanyahu densema region nung lenir aikati Sheikh Mohamed bin Zayed

dangi call süa parnok UAE den dena lir ta ashi aser par security kumzüka ayutsü mera agiba nung yaritsü lemsatep, ta WAM-i ita tetenzüklen shia liasü.

US aser Israel nati February ita tatemlen Iran dak bomb pokloktsü tenzükba sülen UAE aser tanga Arab linüktem dak Iran nungeri missile aser drone khalokja liasü. Iran aser US nati mulungtepa April 8 nungi tashi mait ceasefire ka sangdonga lir.

2020 küm Abraham Accords nung meyongnem agütsüba sülen Israel aser UAE tsüngta tesendaktep tajungba kumogo, koba US tetsüngtai ia Israel aser Arab linük balala tsüngta tesendaktep ajungtsü asoshi züngzüktepa alitsü.

Iba tezüngzüktepa ya Palestine lenirtemi 'tesülen nungi atsüngba amai lir' ta aitsür, koba Washington, DC nung September 15, 2020 nü UAE Foreign Minister Sheikh Abdullah bin Zayed Al Nahyan aser Netanyahu nati zülutepa liasü.

Xi-i Trump dang Taiwan ken o kumdanga jembitsü ashi

Beijing, Monupii/May 14 (Agencies): China Tir Xi Jinping-i US Tir Donald Trump dang shishilempaba ken o jembiba nung terenlok lir ta ananü senden Brehostibarnü tenzük dang ashi saka Taiwan mechi mangatettep ajanga tesendaktep mejungi akumtsü aser rara adoktsü akok ta tekumdangtsü ashi.

Beijing-i par meyong ta kibur akumba Taiwan onük ya alima nung rongsenketzüng tulutiba linük ana nungi lenirtem ajurutepa kishi shibanger ghonda ana dak tema senden amenba mapang Xi-i süoka liasü, ta China indang foreign ministry ajanga ashir.

Taiwan onük dak alaka tanüngba sendenbo kanga süngjema aser pelatepa mena liasü, ajisüaka US-i Taiwan indang onük mejembi.

Parnoki Strait of Hormuz tanaben lapoktsü jangraba indang lemsatepa liasü, koba Iran rara mechi shibanga lir, aser Xi ya Middle East supplies nung China metaloka aliba ajemtsü atema America nunger totsü alitsü tejangraba ajiteteter.

"Iba ya senden tulutiba asütsü ta ashirtem lir," ta Trump-i Xi dang senden tenzükba ashi, aser aji masüdang Beijing indang Great Hall of the People nung honour guard agütsü aser tanurtem aika adenshia nisan aser naro ayimptena liasü.

Xi-i Trump dang Bodhbarnü South Korea nung US aser China nunger economic aser trade teams tsüngta jembishinüba nung ajaklen tangatettep tajung kati aruogo ta ashi.

Iba ya taoba October ita shishilempaba tsütsü tezüngzüktepa tashi mait ka yanglur aliba mesamadaktsütsü aser tarutsü nung shishilempatsü aser investment atema mechanisms amenoktsü

nükjidong nung lir ta ashir.

Iba senden nung US-i Taiwan dang nok-nü ayokba ken o Xi-i benoktsü imlar, ta tan hopta Trump-i shia liasü. Sen billion \$14 jenjang package ka Trump indang temelaba agitsü ano mejangjai lir, aser Bodhbarnü China-i Taiwan dang nok-nü ayoktsü khenyongi memulunger ta nenshia ashi.

US aser Taiwan ya tesendaktep tejangja ka meliaka Taiwan par sasa kumzüka ayutsü atema US-i yaritsü ozüng agi alena lir.

Onoki ajangshiba ken o nung Taiwan ya tongtipangtipa lir aser aji junga anepalu mesüra US-China tesendaktep ajunga lendong aliba tensa kati aitsü aser rara tenzüktsüa akok, ta China leniri Trump dang ashi.

Osangbener temi Trump dang Temple of Heaven nung Xi den külemi noksa tangokdang Taiwan indang jembi asü mejembi ta asüngdangba pai melanzü.

Parnok ya state banquet ka nung adentsü aser iba sülen Hukulbarnü külemi chiyongtsü.

Trump aser Xi nati shishilempaba aser aluyimba tsütsü amalitep ulushitsü mulungtep aser Middle East, Ukraine aser Korean peninsula nung tensa mejungi aliba indang tangatetba lemsatep, ta China-i iba senden tembangba sülen ashi.

Parnoki China nung America nunger shishilempar temi atema shishilempaba ulushitsü aser US industries nung China nunger investment tali akumtsü indanga jembia liasü, ta White House-i ashi.

Trump den külemi CEOs telok ka China den ken o angatetteptsü aru, aser item rongnung Elon Musk aser China nung tzükchir ama züngshiba Nvidia indang CEO Jensen

Huang dena lir.

United States-i Nvidia indang tashi tait H200 AI chip alitsü China nunger firms 10 shi dang melaogo, saka tang tashi iba oset tejang kata agüja mali ta ashir.

Trump-i China aser tanga linüktem nungi oset bener aruba nung tariffs meshitsü pa dak tashi aliba US courts temi amshitsü memulunger.

Ano Iran rara ajanga kidang osettsüset nung jenjang tali kumogo aser Trump'er Republican Party ya November ita midterm elections agiba mapang tashi maitba akumtsü amai ajiteteter.

China rongsenketzünga mejungi kumogo, saka Trump ama Xi-i rongsenketzüng mesüra yimtenren tsütsü tetsükdaktsü kangabo mali.

Ajisüaka linük anaprongi taoba October ita trade truce yanglua aliba meraksai amshiner, kong Trump-i China nunger oset nung triple-digit tariff meshia aliba agientsü aser Xi-ia tongtipang rare earths soita aliba chiok.

Mapang talangka nungi Trump mepelai aruba trade deficit ajemdaktsütsü mechi Washington-i China dang Boeing, farm oset aser energy oset tem ayoktsü ama ajiteteter, aser Beijing-ia US-i chip yangluba oset aser semiconductors ayokba nun galena aliba saladaktsüner, ta ashir.

Shishilempaba dak alia Trump-i China dang rara tembangtsü asoshi Washington den tezüngzüktepa ka yanglutsü atema Iran mesüzükdaktsü asoshi ajungshitsü imlar.

Ajisüaka Xi bendanga agütsür Tehran den iba onük jembitsü aikati tamang makar, kechiaser United States den tokteptsü asoshi Beijing atema Iran ya kanga tongtipang lir.

Office of the MOLUJUNGBA SEMCHIR H.Q Longsa-798601 KHONANG TETUSHI AGÜTSÜR

Ao Lima nung Longsa yimdak nungi Molujungba semchir Wb.Sangyumanen aser Wt. Temjenkala kibong nungi tetangshi kaketshisashir **Wb.Tinumayang**, pai NSSB tatitang nung JUNIOR ACCOUNTS ASSISTANT (JAA) Department; Treasury and Accounts nung mapa ngutetba atema mulungnen yimyim ozü kidong inti tenüng nung iba sabang nung lemsateper. Teyanglur Tsüngremi Wb.Tinumayang tarutsü anogotem nung lanur jenti asoshi arangshi longzük ka aser shisatsü anetdak sanen tajung ka kuma arishi anogotem talang moajangni ta sarasadema moatsür.



Sd/- Nungsangtemshi Tatar

Sd/- L.Tushi.Jr (Gen Secy)

TASOBA KÜM NOKLANGJONGMUNG TEPELA LEMSATEPER



Ozü tsürabur/Otsüla **Mrs. Toshimongla Pongen** (Longjang Village), küm 1926 nungi 2026 tashi arishia anir aruba angudang Tsüngremer temoatsü aliba angateta Pa nem tenüngsang agütsür.

Otsüla tamang sarasadem ajanga la aser lar kibong, semchisemnur tashi temoatsü manung len ania arudagi aser iba akhümbok nung tanü onoki tsürabur küm Noklang Ka (100) ajungba anogo mung amunger.

Ozü taküm nükmendong asoshi chirnur aser semchirtemi nü nem tenüngsang agütsür. Tulusang Tsüngremi ozü tsürabur taküm ano maneni moajangma ta ozü sarasadem .

Tepela Tasoba Anogo Salem.
Chirnur, semchisemnur aser kinungertem

ALAPONG SEMCHIR LONGJANG OLEPLANG

Aor Jamir Mungdang ajanga Tir Yimyim adok 204, Dated 8th May 2026 nung YONGSEN dak KUMCHU tang jakzük ta sangdonga alibaji, Longjang nung aliba ALAPONG Semchiri aitsür.

Longjakrep Semchir Tera (Lirem kaket) 2023. Tapak 63 nung koba züluogo, ibai ozü otsü. Onok YONGSEN semchirtemi jangja-a meteta lir.

Sd/- **Wb. Samanungba Jamir (Tatar) Longjang**

Sd/- **Wb. Akangtemjen Jamir President, Longjang Jamir Kidong**

Russia-i asemnü buba Ukraine amaker, nisung 7 tepset

Kyiv, Monupii/May 14 (Agencies): Russia-i Brehostibarnü agi asemnü buba drone aser missile amshia Ukraine amakdang Kyiv nung apartment building ka ajasatsü, kong nisung tenet tepset aser aika yiru, ta ketdangsürtemi ashir. Ano linük tesem balala nung amakba mapanga civilian aika yiru.

Kyiv nung anepdang sangwa aruba mapang Darnytsia kiyong nung teraksa tali jangja akum, koba suburban forest ka aser Dnieper River tsüngta lir. Story toku atongtepa aliba apartment block ka chireper alidak nungi mokozi alonga liasü, kong emergency workers temi concrete slabs telung tupoka liasü aser nisungtem stretchers nung bener ao. Iba ki telungi aiba kishi ya amakdang

raksatsü, anungji yangji alirtem temai madokteti nokdanga liasü.

Iba building nung apartments 18 aliba ajunga raksatsüogo, ta ketdangsür temi ashi. Asürtem rongnung arishi küm 12 tetsürchanu ka liasü, ta Mayor Vitali Klitschko-i ashi. Emergency services-i nisung tenet tepset ta ashi aser nisung 20 shi samar alitsü südi ta amanger.

Ibai US Tir Donald Trump-i China semdangba den mapang kasa nung ataloker, ta Ukraine ketdangsür temi ashir. Küm pezü tashi Ukraine amakba anentsü atema Russia Tir Vladimir Putin ajungshitsü Trump aser China lenir Xi Jinping jenjang tajung nung lir, ta Foreign Minister Andrii Sybiha-i ashi.

(Maneni tapak 8 nung...)

Crawley, Pope na England Test squad nung mezüngok

Monupii/May 14, 2026

(Agencies): New Zealand den Lord's nung taruba ita mezüngbuba Test asayatsü aliba England squad nung opening batter Zak Crawley densema mali.

Australia den Ashes asayamung 4-1 agi makokba sülen England team yanglushiba mapang tang squad ya sangdongogo.

England-isa, taoba mapang Australia nung batter Marcus North national selector asütsü shimba sangdongogo. Tang mezüngbuba bendanger ka iba mapa atema shimogo.

England-i ashiba agi, senior team nungi tenzüker youth programme tem atema England tebur squad shimba nung North-i teyari agütsüsü.

North ya mapang talangka English domestic cricket nung shilem agia aruogo. Pa 2018 kum nungi county team trok tashi nung inyakogo aser Durham County Cricket Club indang director of cricket mapa dena benogo, kong pa England Test captain Ben

Stokes den inyaka liasü.

National team shimba mapang county nung asayaba masadanga atema taoba mapang asayatem aser pundit temi England selector tem aija aruogo. Maneni Ashes nung tamakok anguba sülen taitsüba ya tali aküm.

England team ya New Zealand nung coach Brendon McCullum lenisüba nung asayadar.

North-i Luke Wright melenogo, shibai kum asem tashi iba mapa benogo.

Stokes aser McCullum na lenisüba nung Ashes nung kanga mejungi tamakok anguba sülen asayatem melenshitsü imla liasü.

Crawley den külemi No. 3 batter Ollie Pope-a June 4 nü nungi tenzüka asayatsü aliba mezüngbuba Test squad nung mali.

England-i asayar tasen asem shimogo aser fast bowler Ollie Robinson-a kum ana sülen meyipa aruogo.

2025-26 Ashes tour nung Crawley-i junga masayatet aser pai innings 10 nung run

273 dang yanglua liasü.

Stokes aser McCullum na lenisüba tenzüka sülen Crawley tang mezüngbuba squad nung mali. Asayar tasentem rongnung opener Emilio Gay aser wicketkeeper-batter James Rew na densema lir.

Gay ya taoba kum ana tashi limited-overs internationals nung Italy nungi asayaogo, kechiyong tetsür Italy tsür lir.

England nung pace-bowler tem agi anünga lir. James Anderson aser Stuart Broad na den Chris Woakes-a asaya nungi anisüngzüko aser Mark Wood o Brydon Carse na yirur lir.

Squad ya mezüngbuba Test atema dang lir aser tanungba Test ana atema mapangtong nung sangdongtsü.

England Squad:

Ben Stokes (captain), Rehan Ahmed, Gus Atkinson, Sonny Baker, Shoaib Bashir, Jacob Bethell, Harry Brook, Ben Duckett, Matthew Fisher, Emilio Gay, James Rew, Ollie Robinson, Joe Root, Jamie Smith, Josh Tongue.

Frederic national junior tebur hockey team coach kumogo



Monupii/May 14, 2026

(Agencies): India-i Brehostibarnü PR Sreejesh melena national junior tebur hockey team head coach mapa abentsü atema Sreejesh melena France nung Frederic Soyez shimogo.

Sreejesh ya taoba mapang goalkeeper ka liasü aser pa contract tembangba sülen mapa nungi anenogo. Pa ita 17 inyaka liasü. Taoba kum FIH Junior World Cup nung pa lenisüba nung India team-i bronze medal ngua asaya-aka pa mapa nungi anenogo.

Social media ajanga Sreejesh-i pa kanga tezü adanga lemsatepogo aser ashiba agi, pa coach asüba mapang asayamung pongu nung medal pongu nguaka pa indang tenure tembangogo.

Ajisüaka Hockey India-i ashiba agi, India nung 2036 kum Olympic Games ayongzüka asayatsü nükjidong aliba nükla nung yur iba jenjang agiogo.

Soyez ya Europe nung hockey coach tem rongnung

ajak dang takok tajungtiba anguba coach ka ama züngshir, aser pai kum 15 tashi France tenüng nungi international jenjang nung asayaba aser kum 15 dak tema temaba jenjang nung head coach mapa inyakba tajangshiba bener arutsü.

Pa France tenüng nungi 1995 nungi 2010 tashi asaya aser iba mapang pai international asaya 196 nung goal 195 idakja liasü. Coach ka ama pa lenisüba nung France aser Spain national team naprongla asayaogo.

Soyez, Olympic asem tashi nung shilem agiogo. Pa lenisüba nung Spain team 2016 kum Rio aser 2020 Tokyo Olympics nung asaya aser France team 2024 Olympics nung asaya liasü.

Spain nung inyakba mapang pa lenisüba nung team-i 2019 European Championships nung silver medal angu aser Rio aser Tokyo naprongla nung quarterfinal tonga asayaogo.

Soyez ya lanur asayatem anitetba atema kanga nüngtugu lir aser pa lenisüba nung 2013

kum France team-i FIH Junior Men's World Cup nung silver medal aser 2025 European Championships nung U-18 tebur team-i silver medal nguogo.

Ano pa 2021 nungi 2024 tashi French Hockey Federation indang High-Performance Director liasü.

Coach ama pai FIH Men's Hockey World Cups (2018, 2023) ana, European Championships (2013, 2015, 2017, 2019, 2021, 2023) trok nung shilem agiogo aser iba ajanga international jenjang nung pai tajangshiba peria bener aliba sayur.

Domestic jenjang nung Soyez-i, 2012 kum Lille MHC team French Indoor aser Outdoor Championship takok dangi ani aser kasa kum EuroHockey Trophy Indoor aser Outdoor title dena bena liasü.

Hockey India indang nükjidongji international mongintem den külemi inyakdakja India nung coach tem anitetsü atema lir.

Hockey India tir Dilip Turkey-i Soyez pelashishia agizükogo. "Onoki Hockey India-i Frederic Soyez pelashishia agizüker. 2036 Olympics nükla nung yur inyaktepba mapang pai international jenjang nung tajangshiba balala bener aliba aser pa tasa ajanga Indian hockey ajangzüksü ta amanger," ta Turkey-i ashi.

Temeim Ojala MRS. LT. LOLENLA
Sür kum 2 ajungba menungra bilemteter.



ASÜ - 15.05.2024

Temeim Oja, na onok dang nungi pila-a or joko kum 2 tashi renteta arur, nai onok doktsür oaka na taküm alidang onok dang mapa tajung kechisa sayua doktsü item mapa tajung aser nü sayubentsü ajak onok molungjang nung rezünga ayur. Onoki na teti bilemteter, nü temeim kodanga mamadoktsü.

~Temeim kinungbo, chirnur, semchirtem aser kinunger

Inter Milan-i Coppa Italia final nung Lazio 2-0 agi kokogo

Monupii/May 14, 2026

(Agencies): Inter Milan-i Bodhbarnü Stadio Olimpico nung Coppa Italia final asaya nung Lazio 2-0 agi koka domestic asayamung tanabuba kokogo.

Tawa-ang Serie A title 21buba abenba sülen tang parnoki iba asayamunga kokogo. Asaya nung Adam Marusic-i own goal ka idaktsü aser Lautaro Martinez-i tanabuba goal idakja parnoki Italian Cup 10buba kokogo.

Tetenzük nungi Inter Milan puri asaya amokbanger asaya aser minute 14buba nung corner ka nokdangtsü merangba mapang Marusic-i parnok indang goal nung goal ka idaktsü. Iba sülen Inter-isa maneni asaya amokbanger asaya liasü.

Asaya mezüngbuba shilem nungsa Lazio defender Nuno Tavares-i ball mazüoktetba sülen Denzel Dumfries-i kara kara Martinez nem ball agütsü, shibai tanabuba goal idakja liasü. Pa asoshi iba ya tang asaya aliba season nung goal

22buba liasü.

"Season tepeyong kanga junga asayaba sülen iba asayamung akoktsü onoki langa liasü," ta Inter coach Cristian Chivu-i Mediaset dang ashi.

"League aser cup naprongla akokba ya züba züba agitsüba ka masü. Onok kanga pelar," ta paisa shisem.

Asaya tanabuba shilem Inter puri aziöker asaya aser Lazio puri goal idaktsütsü asoshi maongka monguteti liasü. Asaya nungsa Luis Henrique-i tera agi dang tasembuba goal midaktsü aser Lazio asoshi goal idaktsütsü atema maongka tajungtibaji Boulaye Dia-i angu, saka pai metsüba balala goalkeeper Josep Martinez dak tsükdak.

Lazio pur season tepeyong timtem balala ajangshia aruba sülen tang iba asayamung nunga tamakok ngur tembangogo. Fan temi club kibur Claudio Lotito anema langkah ait aser final nunga parnok aika aruaka parnoki maneni langkah aita laisü.

BENDANGLI OSANG : Tapak 7 nungi...

Russia-i asemnü buba Ukraine amaker...

"Alima nung tashi tulutiba linük nungi lenirtem Beijing nung senden mena aser alimai tesunep aser amalitem imlaa alidang, Putin-i Ukraine yimtiba nung drones, ballistic aser curise missiles noklang aika khaloktsü," ta Sybiha-i X nung zülu.

"Moscow ajungshiba ajanga dang pai anentsü," ta Sybiha-i Putin indang ashi.

Russia-i ballistic aser cruise missiles khaloktsü aser Bodhbarnü nungi tenzüka Ukraine nung alidak drones 1,560 dak tema khaloktsü, ta

Ukraine Tir Volodymyr Zelenskyy-i ashi. Nisung aliba ki 50 dak tema densema linük tesem balala nung tesem 180 shi raksatsüogo, ta pai ashi.

British Defense Secretary John Healey-i Brehostibarnü amakba ya taoksatsüka lir ta ashi aser UK-i air defenses agütsüba tali kumdaktsüogo ta ashi.

Ukraine nunger Kremenchuk, Bila Tserkva, Kharkiv, Sumy aser Odesa yimtitem nunga bomb pokloktsü, ta ketdangtsür temi ashir.

BILEMDANGANG

"Tangar kar tilutsüba agi na parnok dang nungi tajungba makümer."